

四庫全書

集部

欽定四庫全書

立齋遺文卷五

明 鄒智 撰

詩 五言古 五言律 七言律 五言絕

七言絕 七言歌行 詞附

送客南征 以下五言古

疎雨不復月蟋蟀空自鳴出門送佳客正值新月晴月
晴已足嘉况復驚波平君知愛月意莫惜清宵征

槐陰午坐

溽暑渾如蒸槐陰殊可愛
招邀館中英趺坐一解帶
蟻戰疑有屯鳥度知無碍
煩襟聊爾清吏胥趣晚會

九日寫懷五章

秋風策策鳴秋水盈盈隔抱膝
坐虛齋有懷長自結
昨日楚人來前日巴人到入門
問蒼生蒼生日凋耗
剪爪宜及膚割髮宜及體
肉食者何人視之如逆旅
茱萸賜朝士一士分一枝
君恩豈不濃民瘼誰當醫

東隣有醇酒可以澆清愁蒼生倚大臣不必書生憂

送黃汝脩還天台

天台有一士獨抱男子腸立朝五六年歛退藏鋒芒人
皆疑其圓我獨疑其方一朝解牙牌上疏辭君王問之
何因爾恥對妾婦妝牙牌一飄瓦碎盡何足傷白璧苟
微瑕此恨千古長我聞定軒翁古道恒自將見子慷慨
歸喜極當欲狂春風扇微和天台花正香請君陟其巔
挹彼武夷蒼

送吳獻臣令順德

熠燿非自燃
蝙蝠非自沸
盈盈天地間
孰非天地字
君侯人中英
經綸有高致
欲分四海憂
當自一邑試

代柬吳順德九章

吾兒即公兒
公母即吾母
公母撫吾兒
何異吾母撫
所慮兒太烈
出入不可制
或時走城闔
或時臨水次
南衙錢二緡
盡散公兩僕
我欲抱兒勤
公莫讓私蓄
主人赤脚漢
欲賃西城夫
自言夫頗閒
一任吾兒呼

我處赤脚久其心真可信一以為吾兒一以為窮困
平生壯士氣可以摧三軍念見到中宵銷盡不復存
家書幾時封幸為封仔細封訖寫路程庶幾易傳遞
白髮披高堂悠悠七千里遙思念我心寧獨止于此
去年猶有泪今年惟有血寄與田承君事與道鄉別

有感

山木有時枯江魚有時渴人生天地間豈能千古活渴
者非自乾枯者非自割人惟人其人生殺天予奪

送人作縣丞

作縣如作室作官如作工斧者奔而西鋸者趨而東執
事雖不齊所期在成功君本蜀中彥素以才自雄我觀
吞吐間絕非吳下蒙今承梓人旨百里生斤風有玉正
當錯有刀正當礪勿論簡與煩勿計卑與崇但令間架
立也足為帡幪

挽吳孟謙

順德縣丞

憶昨邊事棘君遇我畏壘君裳甚蕭疎君坐獨喂嶠坐

久竟無言言輒無破礪我時心異君蓄縮不敢揣繼與
長官俱長官亦推媿謂從君到來庶幾悉君委公庭靜
於寺詩思清於水尋聞漕運歸病篤不復顧長官對我
言淚落如泉漑念君清流才下與諸掾遺辛苦三十年
化作殊方鬼我病渴未消送君不臨沈寂寞短乎章聊
以當君誄

送劉汝德還蜀

以下五言律

兩地八千里忍看生別離最知憂道切不是愛山痴晚

金史卷之八十五
卷五
雨雖微急晨光本自熹明年二三月正是望君時

壽祖母

天開當子月祖壽起寅年善本殷勤積家惟澹泊傳乾坤堯舜禹日月坐行眠遙憶高堂上冰桃似水鮮

送李訓導之官

先生萬人傑起自錦江濱天上逢堯舜人間養鳳麟淳風千古吹化雨一番新國朝青史上有傳表儒臣

上林春色 三首

今年春色早惟有上林先蟄起驚雷下水消杲日前枯
株扶冉冉嫩草踏芊芊東風隨處到造化本無偏
今年春色麗惟有上林明暖日崇桃映踈星積李橫碧
鷄臨水舞黃鳥逐人鳴東風隨處點造化本無情
今年春色透惟有上林深石山開遍錦穀雨溜成金折
發程願諫移栽趙鼎箴東風隨處補造化本無心

偶成

自笑胃巢耗猶能萬里飛佩韋知己晚刻鵠此其幾清

拱光華遠高堂信息稀孤舟如可挽野水莫相違

晨興用楊方震韻

夜誦香初燼晨興鬢尚蓬風嚴凝水立雨淨見天空飲
藥殊無効澄心間有功不知天地裏何處是途窮

題寬齋卷

迂邈荒茫外雲莊縹緲中葉粘寒露落花聽雨聲紅凝
重黃通老和平呂伯恭更應泥塑坐渣滓盡銷鎔

題松泉卷

嶺樹重重合江流曲曲深
亂雲時出沒寒月夜浮沉
飛鳥爭深港游魚度密林
黑龍渾不起時復抱珠吟

挽歐陽先生

同年時舉之父

紫詔初黃髮青騾竟白雲
枯榮真夢覺今古一朝曛
人往儀刑在墳高草樹分子孫
俱俊彥足以答明君

寄賀馮指揮

珍璞須驍捷綏懷仗老成
靜觀諸將遍莫是此公并
野店開門宿深山放膽行
驅馳三十載髀肉未全生

海行遭風次獻臣韻

己酉年冬作

今夕知何夕浮生又網羅
真成抱空月無計障顚波
粗比堯夫幸終慚叔子多
窮途仗神道聊復對君歌

送丁太平之任

以下七言律

元化都憑岳牧宣
丁侯今領廣山川
琅函錦帙詩三百
爍石流金路幾千
能識乾坤均父母
可令兄弟獨顛連
太平有象真難致
莫道文官不愛錢

太液池觀蓮

鳳輦初臨太液池
池中君子肅朝儀
清香冉冉風舒卷
踈影沉沉月正歌
抱負胸中應有寶
經綸天下豈無絲
太平更得君王寵
萬種繁華總不知

玉堂槐

一自文皇植此根
累朝培養更殷勤
地清半擬三公位
天近爭看列宿分
宿德應生真宰相
雄才寧羨大將軍
老蛟墮地如人立
震電驚雷只亂蚊

內垣芍藥

暖風作伴彩雲粧笑倚宮牆夜有光五鼎味中知自別
萬花會裡定誰強雅圭壯起延開寶介甫南來致靖康
世道盛衰真差異天幾先露一圍黃

新燕

白玉堂開日正遲瞥然驚見燕兒飛荼蘼架遠和烟度
玳瑁梁高戴月歸小掠芹泥猶怯冷初沾杏雨未生肥
千言萬語無人會只付東風主是非

送劉御史致政西還

中外飛駭二十春黑頭先已厭紅塵才登殿上朝元辟
便入山中侍老親張禹悠悠終誤國范滂諤諤竟危身
風流孰與陶元亮自是羲皇以上人

感懷 次湯侍御韻

兩年孤負切雲冠已覺清羸帶眼寬梅大十圍應自白
葵長一丈為誰丹劍如可借朱槐里股不能箕管幼安
時止時行熊掌在百年分付史臣看

送溫重廉還臨江 溫傳先生之甥

差見臨江第一仙丹崖青壁欲生烟祥鸞忽報當年信
靈鵲真成此夕緣元獻眼高應絕世文忠才大合擎天
臨岐預作重逢約紅杏香中早着鞭

中秋賞月 和湯侍御二首

一年初識此公樓縱不能詩也合留北極光華南極是
今人風致古人求仰登玉宇非無路共濟蒼生合有舟
塵鬢照來全未白乘風好遡泰山游

天地中間共倚樓夜深猶自挽衣留白榆丹桂端誰見

玉兔銀蟾莫浪求
活水照人真寶鑑
浮名於我本虛舟
詩逢大將應難敵
況擁雄兵據上游

和刑部諸公賞菊韻二首

濁思如何豈易膠
微官聊復得閒勞
晚香敢謂安陽淡
真意還輸栗里高
萬葉亂飛孤此傑
三秋中賞定誰曹
一聲長嘯非難事
莫向花前浪鬱陶

寫盡寒烟與敗膠
愛花寧厭賞花勞
酒兵入陣霜初破
詩將登壇月正高
絕俗自宜蓮並價
策勲當與杞同曹

故知逸興真難盡更約明年共和陶

送董庶子使朝鮮

天啓休符又戊申獨啣紫詔下楓宸
弛張仰見真文武出入爭看老鳳麟
七葉皇風清八道百年高節重千鈞
文章光燭烟霄上未是中朝第一珍

送劉侍講使安南

聖主龍飛九五天只從堯舜接真傳
豁開日月雲俱靜運轉風雷化自宣
司馬攜僮歸政府紫陽抱道侍經筵

使軺未度東津水已震西南萬里邊

送林居魯之杭州

古貌堂堂兩漢儒直從心地做工夫
笑揮豸角囂塵靜勇犯龍鱗眷紓南
斗星高光北斗東湖梅老主西湖
芳心未用愁遲暮天上靈脩目正盱

聞二祖父三祖父皆以年冠帶詩以志喜末句
悲先祖父之不起也嗚呼一喜一悲之間其所
感者深矣孝子慈孫尚思所以惜時愛日以盡

養志之誠也哉

鐵杖扶來八十年金函開詔沐龍涎鹿胎軟襯蟬冠正
魚珮高懸鶴氅鮮俯仰山中間宰相醉醒世上活神仙
瀧岡未表乾封固萬里孫兒淚洒天

送李天瑞之咸寧

次姜仁夫韻二首

立馬盧溝話壯游關河西去道途脩忠肝義膽誰當傳
白日青天本自秋千古天網嗟鹿角百年臣節仰魚頭
聖賢步步皆平地莫向空中浪倚樓

世道悠悠幾日還上方無劍斬窮奸跛麟載筆真辭闕
孤鶴乘風欲渡關履善自能歌正氣季通端不動愁顏
丈夫惜別非無淚不向忠臣此日潛

送夏廷璋還南都

南國衣冠子勝流相逢便與啖元脩初怪眼中無皂白
豈知皮裏有春秋交游獨我聯貂尾廊廟何人重筆頭
一寸丹心危欲折夢魂夜夜繞龍樓

同鄉李大器先生試教官不第受散官以歸此

雖舊例然待常調者多戀戀不忍舍先生此舉
亦為奇特云

玉河寒溜隔橋鳴共立橋邊恰五更逸鳥豈能粘以網
化蟲猶自揭于莖道鄉居士何年定少室山人此日成
老馬似知離別意徘徊柳下到天明

金井山居次韻

鐵杖何年入此山今人庵是古人庵春風小圃脩花史
落日疎林縱手談放鶴亭高塵網斷聽鶯橋近楚情酣

莫辭老背尋常灸寒露侵凌恐未堪

偶得寒疾一汗而愈寄伯瞻

此身本與兩儀齊造化誰云是小兒
必有事焉元自欠罔之生也竟何為
華陀自古真難遇鄒浩從今不用悲
却恐故人踈太甚枯梅無復長新枝

鄧秋官進賀還南都編脩之兄

君王不受羣臣賀萬國人心又一醒
虞舜自能敦大本伯夷正好播祥刑
誰家北斗兼南斗此日長亭復短亭

馬上亂將踈柳折不知寒日下林垌

二十夜會飲湯侍御家次其韻

過盡元宵更此燈太平樂事幾人曾極知鰲禁終雄立
豈謂虬髯已勃興詩自春來初試筆酒緣病後卻粗能
夜深明月真如洗十二闌干取次憑

非所寫懷

朝野方傳英主事安危寧係小臣身銀山鐵壁雖難動
玉色金聲本易親人到白頭終是盡事垂青史定誰真

夢中不識身猶繫又逐東風入紫宸

辭朝

雲韶聲靜拜彤墀轉覺嬋媛不自持罪大故應誅兩觀
網疎猶得竄三危盡披肝膽知何日望見衣裳只此時
但願太平無一事孤臣萬死更何悲

留別南畿諸友

大江東下勢如軍萬里秋光此夜分去國元非章子厚
立朝只合范希文荷衣太薄從新製蘭畹將蕪趨早耘

衆口是非何日定自將堯舜致吾君

題易庵卷

靜坐空山老自便登庸策免兩茫然雞豚社裏推前輩
桃李場中謝少年學古每羞元凱癖行高還訝史雲偏
用記中說平生心事知何限夜夜焚香獨告天

讀月湖詩

月湖楊方震別號

甲夜已分還乙夜短吟未已更長吟眼妨還視頻移燭
病怯清寒重擁衾大將師行全整肅老臣建立自深沉

他年餒板誰當寫莫負千秋萬古心

漫賦寄楊方震

宮柳依依辭北闕江楓撼撼度南陬松明書院曾修未
司戶叅軍果是不汲井幾年還抱甕濟河此日合焚舟
虛空筋斗非難打卻恐羲和不易留

留別王守禦

月朗風清水手多孤舟不發欲如何邊無急報將軍醉
嶺有微霜吏目過薏苡豈能誣馬援

時公為軍士所訐故云

荔枝



卷五
久矣待東坡人生去住真如夢對酒惟應發浩歌

題寶澤卷守拙翁手書小學真解遺其子其子
寶之今頗有成立故賦此

墓草知經幾度霜當年手澤尚生光細看此老殷勤甚
直欲諸郎把玩長買櫝還珠今往往畫蛇着足亦偃偃
紫陽臺上真衣鉢千古何人為表章

嶺南道中二首

長衫大袖擁輕輿搭颯乾坤一腐儒平野時時火明滅

荒村往往竹扶疎，備倭將勇妖星落窮海。天寒厲鬼孤
不識，不知朝又晚。幾回慚愧送行夫。

我道炎荒別有天，炎荒也只是西川。諸洋但比瞿塘大，
五嶺何如棧道懸。細和陶詩雖逸駕，力排日錄亦空拳。
樂天知命劉夫子，萬古千秋獨凜然。

初到石城 二首

浪信人言豈盡然，蓬萊元自屬神仙。海浮沆瀣斟初滿，
天放嬋娟賞最先。草木已非王虺路，衣冠全別尉陀年。

昨來盡讀騷人賦最愛長沙第一篇

南北東西幾謫仙小臣獨荷主恩偏疎狂言語施行半
簡靖衙門偃仰便旋織藥籠供檢討剗開花逕待旬宣
老親莫謾憂邊遠此去分茅更一千

藥欄自領平章事詩陣誰分節度權閒拂石床延野
老旋裁木履踏晴烟此二十八字蓋此詩舊時領聯
頸聯語也吾汝愚自以不滿意易以疎狂至旬宣等句
以予論之新聯固典雅舊聯亦雄壯清致俱不可偏廢

也識者以為何如 廷舉誌

除夕

刁斗無聲畫戟寒獨看瘦鶴上闌干荆揚以上雲門鎮
嶺海之間首領官消息盈虛天豈定卷舒作用古來難
直須痛飲屠酥酒此是人間卻老丹

奉和石翁遊圭峯韻拜呈陶憲長

寸鐵安能鑄大鍾行藏空負翠微峯適觀雲谷老人作
恐與武夷精舍同落日還憑高閣望曉風又速畫船東

野花莫亂桓公眼大構猶須訖此工

巡海呈周文郁

逢一疎林酒一行侍兒親倚櫂歌聲昔聞海水如天遠
誰放山花似火明烟外孤帆風正駛苔中歌枕夢初醒
細看斗笠非難製莫遣烏紗累此生

和吳獻臣哀病吟

嶺表何官最我閒我顏原不似公顏坐殘夜雨斑衣冷
望斷秦雲大被難藥盞不曾三日歇柴門常用兩重關

小兒度日真如夢獨釣蜉蝣去不還

玉堤柳 二首 以下五言絕

我行玉堤東靜觀玉堤柳乾坤造化心千古誰能剖
谷風從東來生意萃于柳展也延和儒至誠為君剖

遊青蓮寺

峻嶺橫天插長江夾地流倘能城大順誰敢犯延州

三事堂

為中江王大尹啓昭作

三川豈無吏大抵黃河流獨有王夫子中江一片秋



右清

三川豈無吏大半風流仙獨有王夫子此心常凜然

右慎

三川豈無吏萬事成蹉跎獨有王夫子分陰不放過

右勤

除夕

病客居窮海今年是兩年高堂當此夕相對又潛然

哭華伯瞻 五首

趨向楊遵道超遷賈太中凝香清禁坐不是學冲融
積李崇桃樹鳴鳩乳燕時平生華夫子直道歲寒知
晚踏城西月朝登海北亭空聞仙馭遠不見相星靈
歲月流行速工夫間斷多良朋更凋謝誰與共研磨
侍從才今幾君王寵正初常州何處是頭白小孫孤
伯瞻
之翁常州

悼盧克讓

世有千里馬人無九方臯馬來臯已死天地一聲號

送蔣誠之歸榮

三首

以下七言絕

十日春風醉不醒
獨騎瘦鶴送君行
一源活水來千里
不盡人間聚散情

誰教魑女舞金戈
白雪黃雲奈爾何
醫國醫民須大手
卻教容易度黃河

天壯天南一鳥通
百年忠孝日初紅
古今兄弟知多少
誰似淳公與正公

送文太僕還滁州治

天子聰明古帝王百年日月要重光文山老子憂思遠
獨上中庸第一章

到南昌柬楊方震

纔出都門問路程此心先到豐城豪吟縱飲渾閒事
誰主鵝湖第二盟

過惶恐灘二首

惶恐灘名熟幾年今朝也自到灘前死生未必能惶恐
惶恐微誠未格天

風劈寒江勢兩開
茫茫天地此孤桅
舟人莫謾張皇甚
曾在鞋山滾出來

度大庾嶺

相國祠前下馬行
望中真是黑松林
林邊一曲長流水
照見孤臣萬里心

舟中漫行

淡烟疎雨夢初還
自起推篷看遠山
漁父不知天早晚
又隨鷗鳥過前灣

題古城集

朔方行盡復炎方
野草閒花色色香
却恐牧齋多淨稿
更無人到校書郎

為吳獻臣解嘲

面崖和尚寧還俗
割鼻佳人豈解淫
老母不須投杼走
曾參別是一曾參

讀石翁詩柬

皇王帝伯一蒲團
落盡松花不下壇
豈是江山制夫子

金少卿先生集
卷五
祗緣夫子制江山

奉和石齋先生見寄

風清月朗蛋船輕到處青天有酒星
蓀蓀番禺江上水
幾番遷客夢中經

山亭水閣此何春瘦馬猶存踣鐵身
珍重東風休料峭
今年花比去年貧

大忠祠下聘君家一度登門一看花
花裏有禽驚異客
倩將青箬換烏紗

家父生朝

往年此日在京師西望巴山正欲飛莫道嶺南非善地
小兒初舞老萊衣

海珠寺燕張克脩吳獻臣

二首寺在海心

炎海中間此放舟江淮河濟只浮漚悠悠共老風塵裏
知是人間第幾流

右送克脩

臨流坐石浴鵝夷隔岸何人唱竹枝我是羅浮山上月
隨君直到魏公祠

右送獻臣

夜泊馬寧呈胡用晦吳獻臣

遠臣不與近臣同，但愛花枝照眼紅。
莫道夜深無酒賣，蛋家船在岸之東。

白舫青簾幾夜同，洞簫聲裏海雲紅。
百年身世今何處，笑倚梅花月正東。

次蘇伯誠韻呈石翁

山盡雲壇水盡沂，暮春人亦暮春衣。
不知雪月風花老，幾度空山打坐歸。

留伯誠用前韻

病後花壇掃月稀
南枝光映屠蘇衣
一壺未到醺酣處
莫拄挑榔杖子歸

陳益庵下堂而傷其足

益庵本自是神醫也
向花間拄竹枝
莫惜更尋程道士
皇輿正爾賴驅馳

答順德吳獻臣

鄒生但理參同契
陳老今非矍鑠翁
豈謂蒼生能忘我

世間自有汝南公

陳景元為錄石齋集

止得己酉年分

乾坤誰執仲尼權便敢刪從己酉年大笠蔽天牛背穩
不妨寫過戊申前

光潛為餘于趙同知題

緒風初泛紫猊烟拱手絲綸碧海天元祐講官遺話遠
定誰參破老僧禪

復吳獻臣

細把平生點一過病根深在隱微窩
銜枚血戰殊無効更合靈丹乞華陀

丙午鄉試領薦鄉人聚觀于會江門外馬上口
占一絕

龍泉菴上苦書生偶竊三巴第一名天下許多難了事
鄉人何用太相驚

題萬孝子詩卷

匹馬蕭蕭度遠岑霜清月冷亂雲深
兩行青泪衣裳濕

誰識良工獨苦心

晴郊觀麥

以下七言歌行

天街小雨連三日坐聽一鳩鳴
午寂暖風忽放青山紅
滿眼春光濃欲滴呼童羈我槽
下騶散出晴郊破愁的
郊東行盡復郊西鑪錘仰見乾坤力
大麥芄芄碧浪翻
小麥離離翠雲幕今年定合成
豐年不須更檢金穰歷
憶昔關中惡飈起赤血橫流幾
千里草根木葉饑莫充
壯者流移羸者死剪爪割髮雖殷
勤終是車薪點杯水

恭惟帝德同天德一氣薰蒸釀茲麥黃童白叟生意饒
笑舞笑歌游化國小臣坐頌歌太平憂深慮遠歌難成
人之應天曰五事天之示人曰五行憂勤或以咎徵起
逸樂或以休徵生君不見文帝之世多災異武帝之世
多祥禎

題曹御史歲寒圖

早年走馬巴山曲淺綠深紅看不足颼風夜作朝蔽江
逸興常隨酒杯覆南來誤入曹公府白日青天開肺腑

手攜十七年前圖掛在高堂令我譜酒酣耳熱烏紗偏
茫茫四壁生寒烟山童澤涸天地槁嗟此三傑何孤騫
鬱然蒼者老臣器方履圓冠帝庭議小人見之皆斂容
君子見之皆吐氣粹然清者大儒質玉色金聲士林式
存乎其中為靜虛見乎其外為切直皎然潔者真仙粧
玄裳縞衣瓊珮光魄常精明而不亂竟常安靜而不揚
海眼須臾湧晴月照見風神愈竒絕崖前氷柱顛倒垂
勢不能凌還自折我觀大化如海濤汐者自汐潮自潮

苟非三極兩間立元會運世今已銷歌聲如鐘歌轉烈
公去襄陽我南粵窮島寧無突兀枝點綴何妨四三傑
西泉曹先生自為布衣時與同郡張君廷儀
艾君邦彥交繪松竹梅圖以自識後先生為
諫官正色危言稍得行其所學而二君猶布
衣也弘治三年秋先生謝病歸襄陽取其圖
授智俾永言之以洩其思并持以遺二君云
送李千兵南歸

李將軍萬人敵目如光電髯如戟口誦元和詩手捧神
堯歷西風來獻北風歸渠黃忍挽青絲勒別君昭王臺
送君亞夫壁有力當為今王宣有血當為先主滴男兒
一日定千年肯把離愁對親戚

清江捕魚圖

江水生江月起青簾白舫江風駛江頭老翁披短蓑獨
泛江心羨魚美大張一網羅羣魚羣魚湧出清江裏勇
者傷於鈎貪者傷於餌起者如浮瓜落者如沉李散者

如疎星合者如聚螳螂者如弱弓擲者如强矢入者困
而怒出者躍而喜動者舞驚濤靜者潛芳芷大者三尺
五尺長小者七寸八寸止老翁一縱仍一擒網大魚多
莫之紀須臾捲盡千頃波勢及馮夷也披靡我聞董生
嘗有言羨治羨魚同一理今開此卷披此圖乃知此工
真畫史

題資軒卷

貢資章流益長奎資壁光益密人資人學益深資軒居

士知此意盡日凝香延客至

送朱士佩先生之樂平

秋風揚春天長姊歸姑惡鳴相當崇桃分日色積李分
月光鳶飛魚躍斯道彰十年不出巴山陽獨攜天澤東
南疆俗吏紛紛何足數當與西漢君子爭清芳

送蘇伯城詞

詞曲附

水調歌頭

微雨歇煩暑輕風迎晚涼攜手伏波橋上平水正蒼茫
千峯歸鳥縱橫兩岸飛花下上恰好是斜陽把酒為君

舞君當傾幾觴 道路難功業遠歲華忙莫負良天美景
終古恨空長先生玉府神仙小子石城居士爛醉兩何
妨阿真何處在梵起紫猊香

立齋遺文卷五

立齋遺文

附錄

或人問答

楊廉

或問諫官專於言事乎曰官以諫為名言事其職也不
言可乎曰昔韓退之譏陽城不諫歐陽永叔責高若訥
不諫不言則失其職也程明道為御史裏行嘗對神宗
言使臣拾遺補闕裨贊朝廷則可使臣掇拾臣下短長
以沽直名則不能何也曰明道以格心之學欲堯舜其

君其對君言專於責難不得不爾至他日論王廣淵青苗掎克王安石剛褊自任亦何嘗不言臣下哉但其所謂長短者非若後世捃摭鄙褻瑣細之事以為言耳曰諫官之外侍從之臣皆可言乎曰觀司馬溫公不拜樞密之言謂為侍從於天下事無不言是也曰諫官侍從之外其不得言乎曰梅福以南昌尉論王氏朱雲以槐里令論張禹當時史官記之後世公論黷之何嘗罪其不當言哉或又謂後之言事者類皆好名者也是不然

好名而迺雷霆之威其為計也拙矣且好名與緘默保位以好官爵者孰賢昔人有云求士於三代之上唯恐其好名求士於三代之下唯恐其不好名好名猶可況君臣之義根於人心之固有而非果出於好名者乎世之有言責而緘默者類舉明道之言以藉口其耻已之不言而反嫉人之言者輒曰彼非諫官也是好名者也於乎諫官而諉以不必言不為諫官而限以不當言立人之朝者固忍於塗其君之耳目如是乎余友鄒汝愚

以翰林庶吉士嘗一言朝廷事竟左遷嶺表出余邑與之言別及此因次第其語以為之贈其有病汝愚者則必以余言為抱薪救火矣

美人行為鄒汝愚作

潘府

美人年少未嫁時鉛華淡抹人爭奇美人長髮已嫁後鉛華淡抹人爭嗤美人顏色尚如舊問彼愛憎何異為昔年美人深閨裏隣家有鬪不問誰今年美人出門去同室有鬪須救之良人自外施施歸美人見之羞且悲

觸姑之怒撻流血美人猶自號泣隨大叔未午嫌飯遲
小姑半夜呼輦絲指釁求瑕讒且至一朝被出成分離
紅顏美人原命薄黃沙載道將安辭小姑大叔咲且舞
誰哉為賦昭君詞美人自嗟還自解不相肯與隣家知
為問美人何見出自托蒸梨不解炊美人忠厚本天性
西風猶動良人思

逐客為鄒汝愚作

陳獻章

笛聲且莫哀逐客過江隈還到此邊去盡因何事來著

書多在篋遇酒輒啣杯莫言生意盡寒雨濕枯荄

贈汝愚赴貶所六首

蔡清

晉江人

識君未三月別君遽萬里自疑非丈夫淚落不能止
識君未三月別君遽萬里終不為君恨天地有正氣
識君未三月別君遽萬里應思生才難莫負乾坤意
此行如遊學十年觀造詣炎荒無友生神交方遜志
慷慨出門去默與千秋期飽喫雷州飯莫和淵明詩
我觀古丈夫揮手構寰區節士非得已矧彼章句儒六

籍垂後世豈欲添簡書

王臣

廬陵人

曾將忠讜動楓宸一落江湖嘆逐臣
瘴雨蠻烟回爽氣荔枝椰葉照青春
夢魂頻繞星辰遠朋舊追思骨肉親
指日雷州還召寇未應長作嶺南人

蘇

葵

順德人

孤忠耿耿平生學此日倉皇就道難
別白是非誰直筆蕭條行李幾荒山
九天杲日真能照三月冰山不久寒

人事晦明吾默識子方仍及潞公還

姜綰

山自蒼蒼水自沄東南兩向半瓊分秣陵芳草懷人句
梅嶺寒烟弔古文落落萍花何處是生生穀種及時耘
老天要轉平明運肯使雷州久滯君

趙璜

餘干人

公家百計我身關獨力從容舉大閑萬里一身憐逐客
百年高節稱清班石城風月吟嘲外鐵漢功名伯仲間

早晚聖朝清議定會虛前席待君還

邵猷

福建人

弱冠蜚聲劍閣間龍鱗批逆古今難一封昨日孤臣血
尺馬今朝萬里山縹緲雲霄身世遠指麾魑魅劍光寒
極知此道無終否會見諸賢作伴還

姜麟

金華人

人間誰信有仙蹤親到羅浮石洞中雲水八千真薄海
青蒼四百亂摩空經傳東魯無言妙琴寫南薰太古風

路入江門繞一綫乾坤知有幾人通

廣東石城千戶所吏目鄒君汝愚墓誌銘

括蒼金祺

予與鄒君汝愚未識面時已知名弘治戊申秋一邂逅京師即如故交適予授合守遂與君別明年己酉君遂有嶺南之行越二年辛亥而君卒明年壬子而喪歸又明年癸丑而葬君之仲凡音以生員龔肅所為狀從其舅代馮君平叔來請銘於戲君之事予固思永其傳

君之葬予固思董其役而力有所不逮也銘奚可辭顧
惟不足慰君地下為歎耳君諱智汝愚其字也號立齋
又號秋園世為蜀之合州人曾祖應宗祖洪父太常俱
隱弗仕君生而穎敏過人孝友之行廉隅之節固其性
也髫髻時巍然如老成人十二歲能文章學於舅氏得
書之精傳又大肆力羣經子史一經目即不忘嘗居龍
泉庵貧無繼晷之給則掃樹葉蓄之焚以照讀書達旦
如是者三年文思警拔雖數千言可立就蜀雖多才未

能或之先也成化丙午登鄉榜第一名丁未舉進士簡
庶吉士是歲冬值星變君抗章言事極論陰陽之理直
斥內外執政不職之狀不報聞者為之懼而君以無事
處之由是名愈重君性孤介過於自好其在京師時雖
同年同官亦寡所與聞氣味類已者則求與之交惟恐
後多為人所忌爰因他人事累之逮錦衣刑部獄鞠訊
頗嚴詞不為屈賴朝廷清明以司寇彭公韶之請得不
死謫石城千戶所吏目毅然就道無難色空乏幾不能

存所至親識贈遺一無所受比視事甫兩閱月廢政悉
舉當道重其人而憫其謫往往待以賓禮會總督都御
史秦公紘檄遣董醴脩書得居廣城白沙陳公甫先生
忘年而友之時以詩文相命居無何以公委道順德得
暴疾卒辛亥十月九日也君生成化丙戌四月十五日
至是得年僅二十有六嗚呼哀哉然幸而得死所有大
方伯今都憲華容劉公大夏按其境進士吳君廷舉宰
其邑為營斂具得如禮士君子之能文者民之知義者

相率祭以文挽以詩合賻為歸喪之費劉吳復遣人護喪抵其家其感人有如此者則君之實德有足徵焉者矣使天假之以年則所詣固未可量也卒以困踣而齎志以往惜哉君配劉氏謫官時始得子因名曰遷四歲而天一女尚幼其父以音之子承其世曰繼伯兄春亦以易魁於鄉為陝西清水縣學教諭君所著有立齋集藏於家以今年十二月十六日附葬祖塋之側禮也嗚呼天之於君其所以生死予奪之者若為其如此哉若

為其如此哉銘曰

孰謂君無後道嗣允昌孰謂君無壽令聞允長孰謂君
不祿天爵允臧得於已而不得於天雖死其何傷吁嗟
此丘可以為君之幽藏不可以掩君之幽光苟有秉彝
之性孰不過而傍徨

鄒立齋傳

安陽崔鉞

君諱智字汝愚別號立齋一號秋困子蜀合州人也幼
有異質日誦數百言既長受書於舅氏馮進士衡居龍

泉庵貧無繼晷之給乃集樹葉燃以讀書通宵不寐如是者三年成化丙午領四川鄉試第一郡人聚觀於會江門外君馬上口占曰龍泉庵上苦書生偶竊三巴第一名天下許多難了事鄉人何用太相驚計偕上春官道出三原時大司馬王公恕致政家居君往見之且曰治天下之道在進君子退小人而已方今小人在位羣邪肆毒智此行非但為會試正欲上疏聖天子使進君子退小人則天下其庶幾乎公笑而不答越明年丁未

登進士第入翰林為庶吉士弘治戊申有星變之異君
上疏極論陰陽之理欲退萬安劉吉尹直而用王竑王
恕彭韶且曰君子所以不進小人所以不退大抵宦官
有以陰主之也疏入不報已酉言事者誣知州劉公槩
御史湯公鼐妄言朝政嫉君者因疏君名下錦衣獄君
身親三木僅餘殘喘神色自若無所曲撓供詞畧云智
與今湯鼐等來往相會或論經筵不宜以大寒大暑輟
講或論午朝不宜以一事兩事塞責或論紀綱廢弛或

論風俗浮沉或論生民憔悴無賑濟之策或論邊境空
虛無儲蓄之具議者欲處以死刑部侍郎彭公韶辭疾
不為判案獲免己酉左遷廣東石城吏目毅然就道衣
結履穿幾不能存親識饋遺堅却不受在官盡心政務
廢墜畢舉而持己清白纖塵不染稍暇則從白沙陳獻
章先生遊篤志聖賢之學所造益深矣辛亥十月卒于
廣東得壽僅二十有六卒之日囊無百緡方伯劉公大
夏君同年進士順德今吳公廷舉資之還其家君介直

孝友取予惟義雅負奇氣與人寡合處事慷慨無阿比之習今上首登大寶明日常朝用御史二人侍班糾儀湯公鼎輪侍君造其私第告曰祖宗盛時御史糾儀得面陳政務得失言下取旨近年遇事但惟退而具本此君臣情分所由間隔不通也公以言官奏對幸值大政維新之日請劾盛時故事此太平機會也及王公恕徵聘至京君曰三代而下人臣不獲見君所以事事苟且老先生勿受官職先請見君時政之不便者歷歷陳於

上前庶其有濟一受官職再無可見之時矣二公雖善其言而卒莫能用識者憾之其據經守義大率類此一時權豪貴戚聞其名爭請訓其子弟拒而不納亦不妄登其門忠君愛民之心久而彌篤富貴利達視之漠如也詩文清勁平實不為空言有立齋遺文若干卷吳公廷舉梓行于世崔銑曰嗚呼古義不明古人不復世之素號為士大夫通經術者立乎人之本朝則唯唯默默偷以全軀孰有如君之忠直乎於權貴貨利也見之則

掉尾談之則垂涎孰有如君之剛義乎弱冠之年無導
於前卓然自樹其孟子所稱豪傑之士乎假之以年所
就殆未可量然執此以往則固青天白日斷斷乎不可
磨沒是大有功於名教也故為之立傳以詔天下後世
云

哀時命賦 弔鄒汝愚

蘇 葵

騏驥騁兮康莊松栢鬱兮終藏蹇時命之獨厚兮他膺
其涼莫邪混於鉛刀兮螻蛄限於秋陽何主宰之不均

兮而窮通脩短之靡常也嗟若人兮生何從天地異鑪
兮造化殊工星辰下孕兮川岳攸鍾富文章兮班遷雄
弘器量兮慕夔龍悅仁義兮懷精忠才具美兮德弼中
行違俗兮不苟同蛻污濁兮駕冥鴻吞溟渤兮吐霓虹
障狂瀾兮挺疾風當少年兮奮冲天之六翮下傲睨兮
將銜能於三窟巧剗剗於璠璣兮先梗楠以繩墨崇孤
志之昂昂兮羞怠事而受直罹衆口之曉曉兮遂鑠金
而燬石勤蘭茝以擾鋤兮加欄檻於榛棘伊誰作于匪

臧兮在古投之有北覲然長樂之遺風兮
孫獨友于商之梅栢豈不知禍釁之足畏兮
蹈躅及之危躅惟義激之莫遏兮甘咸雲之就獄
璞屢獻兮徒勞車始行兮說輻謂袒裼而暴虎兮
謂無虞而即鹿鷄魂飛於湯火兮牛誰忍其骸
腓荷天王之聖明兮孫不死於桎梏豈枘方而
鑿圓兮顛裘葛於寒燠慨隴廉之褊心兮於孟姬
而忌歎元城去兮瀕危志完羈兮瘡毒蠖屈後兮
或伸陽剥極兮當復孫何為兮無子方之生還遽
長沙之賦

鵬雖黔婁之有妻兮苦崎嶇於川陸幸趙朔之存孤兮
來或補蓀之不足於乎噫嘻或謂蓀為有罪兮余不汝
非或謂蓀為有道兮余不汝知余哀蓀兮惟命與時蓀
生時兮數之奇蓀受命兮元氣虧惟時命之兩違兮賢
哲其能以有為東野之窮兮敦夫之天兮余於時命復
何疑

祭文

陳獻章

嗟嗟汝愚不括其囊而晦其光汲汲皇皇不小其節而

畏其折轟轟烈烈昔在翰林默語淺深孰識其心頃來
南海窮而不悔乃見其介業以時興行以志成君子之
貞貞德之幹無受天損何命之短已而已而天道無知
哀此孤嫠死不避險生必就檢是曰無忝壯風蕭蕭雲
旗搖搖蜀道之遼觴酒豆肉盡此一哭魂返無速烏虜
哀哉尚饗

劉大夏

公之清才未克一施公之雅操又孰與知官方遠謫壽

竟以虧嗚呼莫致而至莫為而為惟俯仰其無忤雖悔
天亦何悲客亭一酌庶表吾私尚饗

吳廷舉

僕友于公益今五年念相逢之未稔即承惠乎嘉言既
睽違之太劇復承贈乎新篇每嗟盍簪之日遠重僕作
宰而地偏曾計分袂之幾時公忽論事而南遷蓋常以
是為天將玉僕遂以得朋之益終此納交之緣而公之
來也亦非偶然順城何在大海之邊石城西去官舫經

焉僕又藉此得以挽公衣于萬斛風濤之險按公論于
花封床榻之懸或朝談而暮誦或面布而書傳上而天
道之精微極而聖神之功効若僕之愚固已懵懵俛俛
無有於方寸大而網常之理致切而進脩之科條以公
之銳方且孜孜汲汲不廢於窮研至若功利苟且之私
死生趨避之計以僕窺公則已忘情於斯世而富貴貪
饕之念毀譽簸弄之術荷公語僕亦且絕意於機權又
若擾擾膠膠公嘗責僕以不學則老年而荒落而月違

日至僕亦讓公毋畫於略知道體之渾全契誼金蘭此
郎官此吏目情懷風月何瘴雨何蠻烟時尤戲舉神龍
之可啖約驅羸馬以求前惜哉和氣之不充竟使夫君
而未仙嗚呼公之大節忠謀炳烺流布誠有以知其身
雖死而名不死若僕之千瘡百病纏綿膠固則孰為之
破其積而糾其愆抑蒼生之望於時者將如饑之食渴
之飲大旱之雲霓又將孰可使之為稷播穀為禹濬川
為說布霖遍滿乎八埏也耶同志之好斯人之願已矣

已矣哀哉哀哉尚饗

張吉

嗚呼先生為人可謂無負於天之所以禍先生者何其慘耶褫其官而奪其壽孤其子而寡其妻將不欲使斯人復為善耶抑所以報之者日久事定而後見耶將毀命物之道而聽其自相傾軋耶抑予奪之柄潛福默奪而不得以自專耶若此者非余之愚所能明也先生之沒夫復何言嗚呼哀哉嗚呼痛哉

楊廉涂旦

嗚呼汝愚縱子以讀中秘之書胡乃草疏而論執政之
臣置子以步瀛洲之上曷為取禍而投瘴海之濱子體
甚弱奚宜遠行豈知有其國而不知有其身子有父在
家故食貧豈盡忠于君而不暇顧其親嗚呼寔子之道
如此得程書而不能久於朝廷匪子之志如此而不欲
以皓皓之白而蒙世俗之埃塵方子之計至猶疑其未
真不然何殺元城於嶺外者竟一夜而自斃竄東坡於

僣耳者卒不能不使之反輪既而詢得其實始哭于寢
門而涕淚為之沾巾嗚呼傷哉痛子妙齡

金祺

天之生人奇其才不奇其氣是所以全其人也奇其才
又奇其氣則才助其氣氣役其才是造物者之不能全
乎人也君才之高氣之壯可謂兩奇者矣濫之以博洽
之學則所以相助而相役者又有其具矣君將使世之
人置君於何所邪是君自為之歟抑造物者為之歟皆

非我所知也君雖死有不死者存而吾儕為天下惜才者於君悲如何其可已也奠以酒而告以文不識君之聞不聞也嗚呼哀哉尚饗

羅子房

嗚呼鄒公身之摧也大志莫酬命之促也大業中休理之變也公亦何尤有人當道兮范氏之流歸途跋涉兮行將無憂哀哉尚饗

陶魯


公性不凡稟氣並清宏才碩學早飲香名發身鶚薦鵬
化南溟歸翰苑緊欲售其平生之所學顧直道竟弗合
乎口舌之紛爭朝發金門暮處荒城天涯妻子萬里零
丁自謂引君務於當道豈是招憂由於言輕嗚呼汝子
孰為之綢鳴呼汝樞孰扶之行天其有明保此孤嫠薄
賻遠將聊致予情哀哉尚饗

寄吳獻臣

陶魯

近得合州守宋君琢所寄汝愚遺丈連日讀之不釋手

因嘆年兄與汝愚經紀其后事可謂至矣而又為刻其
文汝愚何以得此於年兄哉年兄之風義如此無愧古
人矣敬服敬服汝愚文章風格則楊廷秀胡邦衡議論
則程叔子朱元晦序者以柳子厚為言人品機軸絕不
相粘汝愚以劾時宰得貶子厚以附倖臣得貶貶雖同
而所以得貶則不同序者乃欲強而同之可謂擬人不
以其倫矣年兄可另作一叙不然移書張克脩為之此
汝愚海內知己也



立齋遺文附錄